



# Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7 Yangia anidakangma : f Tir Yimyim tiryimyim@aolima tir yimyim TAPAK 3



Nigeria tir election nung Obi-i tongtipang Lagos state ngutet



Italian PM Giorgia Meloni-  
March 2 nü India semdangtsü

VOL. XX NO. 137 (ADOK 137) DIMAPUR SANGTENNÜ (TUESDAY) TSÜKLAI (FEBRUARY) 28, 2023 ₹ 5.00

## Aonglenden aser Tizit nung proxy voting liasü: Congress

**Dimapur, February 27, 2023 (TYO):** February 27 polling anongo nung Mokochung district kübok Aonglenden constituency aser Mon district kübok Tizit constituency nung ozüing alema inyaksangshiogo ta Congress-i metetdaksü.

Aonglenden nung Nationalist Democratic Progressive Party (NDPP) pusemertemi proxy voting asü aser polling booth pezü nung vote enoktsürtem marudaksüi noktang ta Congress-i tai tongloktüogo.

Aonglenden nung Congress candidate Toshopkba aser NDPP candidate aser Nagaland Legislative Assembly Speaker Sharingain Longkumer na tokteper.

Toshopkba indang chief agent-ia Ungma nung polling station-II indang Booth Level Officer (BLO) anema ken o ka agütsü.

## Meghalaya nung NPP 'single-largest party' asütsü Tripura nung BJP-i maneni takok angutsü

**Shillong/Agartala, February 27, 2023 (Agencies):** Meghalaya nung political party kati danga sorkar akümtsüsa menden mengutetsü ta India Today-Axis My India exit poll ajanga bushitetogo.

National People's Party (NPP) aser Bharatiya Janata Party (BJP) teka amteper sorkar

BLO-i vote enoktsür nem voter slips magütsü anungji Returning Officer-i BLO dang voter slips alemtsü tetuyuba agüjang aser merenshiang ta chief agent-i shidi nung shia lir.

Congress-isa Tizit constituency kübok Tizit yimtsüing nung vote enoktsürtem shilem magidaksüba indang osang metetdaksü.

Tizit constituency nung Congress candidate T Thomas Konyak-i BJP MLA P Paiwang Konyak aser Naga People's Front candidate Tahwang Angh na den tokteper.

Election Commission of India (ECI)-i Representation of People's Act 1951 nung ajemdaker item tatalokba atema teinyaksü mapa inyaksü mepishir ta Congress State In-charge, Nagaland Dr. Ajoy Kumar aser Chairperson, Communications Committee Wezote Kreo nati sangdong ka nung ashi.

akümtsüsa adoktsü ta parnokisa ashi.

NPP-i menden 18 nungi 24, BJP-i menden 4 nungi 8, TMC-i menden 5 nungi 9, UDP-i menden 8 nungi 12, Congress-i menden 6 nungi 12 aser tanga candidate temi menden 4 nungi 8 angutsü ta exit poll ajanga ashir.

(Maneni tapak 2 nung...)

## NLA election 2023 nung vote enoktsür 83.63% liasü Tesem kar nung mepetmesü adok; MP police ka asü

**Kohima, February 27, 2023 (TYO):** Hombarnü Assembly constituency 59 nung Nagaland Assembly elections nung vote enoktsür nisung lakh 13.06 nungi 83.63% ajanga shilem agiogo ta asadangteta lir.

"Nisung 83.63% ajanga shilem agiogo ta asadangteto aser constituency 3 nung mepetmesü kar adokba dak alaka state ajungalen polling tiptema agiogo" ta Chief Electoral Officer V. Shashank Shekhar-i ashi.

Assembly Constituency 59 kübok polling stations 2,291 nung nübortemi vote enoktsü. Ajsüaka connectivity majungba ajanga polling station kar nungi data ano mangu lir, ta pai ashi.

Constituency 59 nungi voter enoktsür teimtibai shilem agibaji Pughoboto nung liasü. Iba constituency nung 92.11% liasü, parnok sülen Tseminyu nung 91.88% aser Mon nung 90.67% liasü ta Chief Electoral Officer-i ashi.

Osangbenertemi re-polling asütsü lir mali ta asüngdangdang "political party aser candidate balala nungi ken o arua lir saka kulikakettem junga repringba aser Presiding Officer temi ashiba nung ajemdaker ang Election Commission-i re-polling

asütsü atema telemetba agütsü" ta Shekhar-isa ashi.

Nagaland ajungalen tensa shitak dang liasü aser polling tiptema dang agitetogo, ta IGP (Range) Nagaland, Limasunep Jamir-ia ashi.

Mokochung, Wokha, Mon, Zunheboto aser Tseminyu district tem nung political party balala tsüingda mepetmesü adokba kar lir. Ajsüaka security personnel-i mapang shitak nung mapa inyakba ajanga lendong tulu matalok, ta pai ashi.

"40 AC Bhandari, Wokha kübok Akuk yimtsüing nung tanep polling station 1 aser 4 temeket nung political party balala züngsemtem tsüingda lung agi ontepba osang lir. Iba mapang injang dena khatokdang nisung 3 yiru saka koba teloki khatok'ar mejangja" ta Limasunep-i metetdaksü.

Iba polling station nung Madhya Pradesh State Armed Police mapa lezmüka liasü aser parnoki tensa azüoktsü atema anünglen injang 8 khatok. Iba tatalokba nung yiruba civilian tenji mozü kidangi anir ao aser parnok junga lir, ta paisa shisem.

Mon district kübok Monyakshu constituency nunga mejangjaba nisug kari security

personnel dak lung agi aonba osang lir. Iba mapang ITBP jawan ka aser Nagaland Police ka yiru.


"Atoizu, Zunheboto district kübok Awotsakili yimtsüing nunga Polling Station 2 nungi metre 200 shi pilar injang khatok. Tanü injang asemben tashi khatok saka CAPF aser IRB indangs section ka den DEF Zunheboto special team ka yokba ajanga tensaji azüoktet. Atoizu nung telungpurtemi shilem agia alitsü akok" ta IGP (Range) Nagaland-isa metetdaksü.

Tanü polling tembangba sülen meyipa aodang Wokha district kübok N. Longchum yimtsüing anasa Madhya Pradesh Police mena aliba gari ka tsükokdang constable ka asü aser asem yiru. Iba lendong nung yirurtemji mozü kidangi anir ogo aser tasü mangji Wokha-i bener aruogo, ta Limasunep-isa ashi.

Tanü polling anogo nung police-i Rs 2 lakh apu aser iba ya züngsema Nagaland nung MCC tenzüker Rs. 35.79 crore tashi puogo, ta paisa metetdaksü.

Taoba ghonda 24 tsüingda nisung 40 apu aser parnok züngsema election mapang timtem agütsür nisung 2900 puogo, ta paisa ashi.

## Exit Poll: Nagaland nung NDPP aser BJP ajanga maneni sorkar akümtsü



**Dimapur, February 27, 2023 (TYO):** 14 buba Nagaland Legislative Assembly atema tanü polling agiogo aser 2018 küm ama NDPP o BJP senteper ano teloktep sorkar akümtsü ama lir.

Peoples Pulse ajanga - Big TV Exit Poll ajanga bushitetba agi taküm election nung NDPP-i menden 20 nungi 27, BJP-i menden 14 nungi 20, LJP-i menden 5 nungi 10, NPF-i menden 3 nungi 8, Congress-i menden 2 nungi 4 aser tangartemi menden 2 nungi 4 tashi angutsü.

Peoples Pulse - Big TV

ajanga February 27, 2023 nü Probability proportional Methodology (PPS) nung ajemdaker Assembly constituency 15 nung asadanga liasü. Parnoki constituency shia nung polling station pezüü shimtet aser polling station shia nung samples 20 benden.

Parnoki samples 1200 tashi bendentetba ajanga kin telemsa, tamangba yimsü aser arishi küm telemsa nung asadanga liasü.

Nagaland nung Congress ya tashi tulu aliba political party ka liasü saka züngsem 60 agi akümba assembly nung parnoki

constituency 26 nung dang toktep.

NPF-i kümsük asemben tashi Nagaland madak yimsü asü saka tang teinyakdak chief minister Neiphu Guolhoulie Rio-i 2018 election jakdang NPF toktsür NDPP tentetba ajanga parnok tashimait aküm.

Ajsüaka, 2018 election nung NPF-i menden 26 nguteta single largest party aküm saka BJP, NDPP o NPP senteper teloktep sorkar aküm. Iba sülen NPP MLA ana NDPP nung aden.

Ano, 2022 küm NPF MLA 26 tashi NDPP nung aden aser lia arudang NPF-ia sorkar nung dena Opposition maliba sorkar aküm.

Taküm election assembly jakdang BJP-NDPP tsüingda taoba mapang ama tesentaktep yanglua liasü aser NPF kija dang toktep.

Congress ama BPF-ia menden 20 nung dang toktep. Congress mesüra NPF ajanga sayatenya meinyaktetsü aser telok anaprongi menden 10 teküpok nung ang takok angutsü.

Nagaland nung dang masü saka Northeast nung state kar nunga party tangatetba nung mesüi vote enoktsür. Yamaji

asüba agi dang taoba Nagaland election nung BJP-i menden 12 nung takok nguteta liasü.

Naga nung er ajak amai Khristantem dang lir aser parnoki BJP tangatetba sülen manidaker, saka Nagaland nung BJP ya tashi itta lir aser iba ya lennir kar nungtugu asüba den Centre nung sorkar asüba ajanga lir. Nagaland nung party melentetba ya yimya ka ama dang kümogo aser MLA temi Opposition nung masü saka sorkar nung shilem aginür.

Taküm election nung BJP-i nübortem dang Modi'er sorkari inyakba mapatem bener votes meshia senzü. Central schemes ajanga nübortem ajangzüka indang parnoki metetdaksü.

2018 election nung BJP-i menden 12 nung takok anguba nungi 8 ji Eastern Nagaland nungi liasü. Eastern Nagaland nung district 6 lir aser assembly constituency 20 lir.

Eastern Nagaland People's Organisation (ENPO)-i "Frontier Nagaland" state meshia election mokdangtsü ayongzüka ajanga BJP kanga shisabuludaksü. Ajsüaka, Union Home Minister Amit Shah-i ENPO mesüzüktet aser parnoki election mokdangba

agiena liasü. Anungji BJP-i Eastern Nagaland nungi tajangzüka angutsü.

NDPP-i tajangzüka kar angutsü kechiyong parnok 'main ruling party' asütsü. NPF jenjang mejungi kümogo anungji parnoki taoba mapang takok anguba constituency teimbaka NDPP aser BJP keti aotsü.

Taküm election nung NDPP-i tayongzüka tuluba ajurubaji par MLA tem (NPF nungi adenertem dena) aser ticket magütsüba BJP candidate tem nungi liasü.

Ajsüaka, iba nung tajitetsü ka lir kechiyong parnok ajaki BJP masü saka NDPP anema tokteper aser iba ya parnoki BJP den angatettepa lir.

BJP-i 2018 küm dang nungi menden teimba ngutetra aser LJP candidate 6-10 tashi kati takok ngura BJP indang MLA teimba asütsü. Iba jagi sorkar akümdang BJP-i tongti shilem agütsü saka parnoki NDPP toktsütsüsa tiabo majurutsü akok.

Peoples Pulse ketdangsurtemi Nagaland nung Assembly constituency 60 prong semdangogo aser voter tem tebilemba metetsü merangogo. Iba ya parnoki exit poll den alia inyakba mapa ka liasü.

# Nagaland kübok district balala nung election agiogo



Dimapur



Mokokchung

**Dimapur, Tsüklai/February 27 (TYO):** Nagaland nung tesem ajungalen 14th Nagaland Legislative Assembly 2023 atema General Election, February 27, 2023 nü agia liasü.

**WOKHA:**

38 Wokha Assembly Constituency kübok polling station ajunga nung vote agütsüba anepdang 7:00 ako nung tenzüka liasü. Polling station ajunga nung amai vote agütsür jenti arua pei temeden vote agüja liasü.

Election tajungtiba nung agitetsü mechi security forces tem peria agütsü.

Election maparen timi agidaktsütsü mechi District

Administration, Police, observers aser Sector Magistrates temi polling station tem sema jaja liasü. Iba osang züluba mapang tashinung jila anasa polling station tem nung azüdokshiba osang meliasü.

**TIZIT:**

41 Tizit Assembly Constituency nung 14th Nagaland Legislative Assembly asoshi General election February 27, 2023 nü takok ngua agiogo.

41 Tizit A/C nung polling station 35 lir aser yangji vote agütsür ajak agi 20,618 (tebur 10,543 aser tetsür 10,075) lir.

41 Tizit A/C nung P. Paiwang Konyak (BJP), Tahwang Angh (NPF) aser T. Thomas Konyak

(INC) nungertem toktepa liasü. **NOKLAK:**

Noklak district kübok tesem kar nung February 27, 2023 nü election mapang timtem kar adokba yong Deputy Commissioner & District Election Officer, Noklak, K. Mhathung Tsanglao ajanga Section 144 Cr.PC benoka liasü.

DC & DEO Noklak ajanga sangdong ka nung ashiba agi, election nung nisung pongu mesüra talila adenshiba memelar, ta metetdaksü.

Iba totuyuba küboki Police mesüra Para-military mesüra military personnel mesüra sorkar tenzüker official duty

nung alirtem, Polling party tem polling duty aor aser arurtem maittsü.

Ghonda 48 tsüngta kibok sema nübuyim jajatsü memelar. Iba totuyuba ya February 25, 2023 nikongdang 4:00 ako nungi February 28, 2023 ayatirm (12:00) tashi alitsü, ta metetdaksü.

Iba totuyuba nung aibelener nem Indian Penal Code indang Section 188 aser tapet ozüing kübok temerenshi alitsü, ta sangdong ajanga ashi.

**MEDZIPHEMA:**

February 27, 2023 nü 5 Ghaspani-II A/C nung 14th Nagaland Legislative Assembly atema vote agütsüba anepdang

7:00 ako nung tenzüka liasü. Iba Assembly Constituency nung vote agütsür 29,163 (tebur 14,561 aser tetsür 14,602) lir aser polling station 54 amshia liasü.

Iba constituency kübok polling station timba nung azüdokshi mesüra rongrongshirong makai vote agüja liasü.

**THONOKNYU:**

Noklak district kübok Thonoknyu Head Quarter nung 14th Nagaland Legislative Assembly atema Govt. High School Thonoknyu nung agüja liasü. Thonoknyu yimtsüing nunga polling station ana nung vote tiptema agütsü aser proxy vote agütsür meliasü.

## Dimapur nung vote agütsür shilem 78 liasü

**Dimapur, Tsüklai/February 27 (TYO):** 14th Nagaland Legislative Assembly 2023 atema Dimapur nung February 27, 2023 nü election agidang vote agütsütsü temsüa alir shilem 78-i vote agüja liasü.

Dimapur nung voters temi Assembly Constituency asem kübok polling station 176 nung pei vote agüja liasü.

1 Dimapur I nung vote agütsütsü temsüa alir tenüing zülüoka alir rongnungi shilem 78.12-i vote agütsü, 2 Dimapur II nungi shilem 75.8 agi vote agütsü aser 3 Dimapur III nungi vote agütsür shilem 81.2 liasü.

Deputy Commissioner & District Election Officer, Dimapur, Sachin Jaiswal IAS

ajanga sangdong ka nung ashiba agi, election dak sendakba nung azüdokshi mesüra rongrongshirong tulu madoki voting tiptema agia liasü.

Polling tenzüker VVPATs ana dang melentsüsa akum, ta pai ashi.

Iba polling anogo nung DC & DEO Dimapur ajanga polling station aika sema jaja liasü.

## Kohima nung kitsük-kirong lendong atalok



**Dimapur, Tsüklai/February 27 (TYO):** Nagaland state yimtiba, Kohima nung shishilempaba tesem tulutiba, Mao Market nung February 27 nikongdang 4:00 ako meta kitsük-kirong lendong tuluka ataloka liasü.

Short circuit nungi iba lendong ya adok südi ta temolung meleni lir. Iba mi yagi market ajunga rongdoka dokan kibur aser anasai adokertem tsübotepa liasü.

Iba lendong atalokba den külemi firefighter tem arua mi remseptsü meranga inyaktepa liasü.

Yaritepba maparen achayangtsü aser iba tesem nung ketdangsur den yariteptsü asoshi Nagaland DGP Rupin Sharma

arua liasü. Tenük kuli akartemi ashiba agi, mi ya dokan ka nungi tenzüker aser mopung kanga kera aonba ajanga anasa aliba tesem tem nung kanga kera kaoloka ao.

Tang tashinung asü-amaba osangbo mali saka mi agi teraksa/takoksa bener arutsüba masadangteti lir.

Iba lendong yagi dokan kiburtem nem takoksa jenti bener arutsü, shirnok iba tesem nung küm aika shishilempa arur.

Ketdangsur temi nüburtem dang iba tesem nungi pila alitsü ajungshir, kechiaser tang tashi tekumzüka maparen maneni inyaker.

## Manipur bomb lendong anema tetsürtemi longkak ait



**Imphal, Tsüklai/February 27 (TYO):** Manipur Legislative Assembly anasa Thangmeiband nung nisung jenti alidak Deobar aonung bomb pokloktsüba anema Thao Womens' Vigilante groups (Meira Paibi) temi Hombarnü mener longkak aita liasü.

Thangmeiband Meisnam Leikai, Imphal nung mener longkak aitba sentong ya Thau Meira Paibi telok nung tongti

zülur Naorem Memcha-i anir agia liasü.

Mejangjaba nisungtemi iba bomb lendong agütsüba ya tasümai mapa, ta Naorem Memcha-i aitsü aser nisung alidak tapokba oset memereploksütsüla, ta ashi.

Kabui Naga women's organization, Thangmeiband Muchi, Imphal iba sentong nung shilem agia liasü, kong "Down with bomb attack," "We want

peace," aser "We condemn bomb attack at the crowded area" ta placards zülüa amer liasü.

Deobar aonung mejangjaba nisung bomb pokloktsüba mapang Thangmeiband Muji Khul Maisnam Leikai, Imphal nung PWD executive engineer Nandeibam Ingocha'er kidang yariteper Bihar nungi arishi küm 33 tain Bikash Kumar yirua liasü.

## Meghalaya nung NPP 'single-largest party'...

Meghalaya nung Meghalaya Democratic Alliance (MDA) sorkar nung NPP, BJP, UDP aser HSDP den independent candidate kar dena lir.

Meghalaya nung taküm assembly elections ya pezüsü-National People's Party (NPP), Bharatiya Janata Party (BJP), Trinamool Congress (TMC) aser Congress lemsar toktepa liasü.

India Today-Axis My India exit poll ajanga Tripura nung BJP-i maneni sorkar akümsü tashi angutsü ta asadangtetogo.

Taküm election nung BJP-i menden 36 nungi 45, Left-Congress senteper menden 6 nungi 11 aser TIPRA Motha-i menden 9 nungi 16 tashi takok angutsü ta exit poll ajanga ashi. Tripura nung 2018 election

(TAPAK 1 NUNGI...) sülen BJP sorkar aküm. CPIM-i küm 25 tashi sorkar yimsü süa aruba BJP-i atsüngdok.

Taküm election nung Sudip Roy Barman lenisüba nung Congress aser CPIM yaritepa BJP den tokteper. Külen Chubar jabaso Pradyot Manikya lenisüba kübok TIPRA Motha ajanga Tripura election asemsü lemsar toktepa liasü.

## 9 Kohima Town A/C kübok polling station tenet tetsür temi ketdangsur liasü

**Dimapur, Tsüklai/February 27 (TYO):** Nagaland nung 14th Nagaland Legislative Assembly 2023 atema General Election agiba mapang 9 Kohima Town Assembly Constituency kübok polling station tenet tetsürtem kisiüing ketdangsur liasü.

Iba constituency nung polling station 43 lir, kong vote agütsür nisung 22,501 (tetsür 11,316 aser tebur 11,185) lir.

Polling station ajunga nung polling anepdang 7:00 ako nung tenzüker aser nikongdang 4:00 ako nung tembanga liasü.

### Delhi Dy. CM Sisodia Mar 4 tashi tepuokdak ayutsü



Liquor policy ken o dak sendakba nung CBI-i Delhi Deputy Chief Minister Manish Sisodia apuba anema logkak aita aliba AAP züngsemtem police-i sota ayuba noksa nung angur.

**New Delhi, February 27, 2023 (Agencies):** CBI-i liquor policy nung ochimashi inyak ta tai tonglokja Delhi Deputy Chief Minister Manish Sisodia apu aser pa March 4, 2023 tashi parnok ket nung ayutsü temelaba agütsüogo.

Hombar nikongdang CBI-i Sisodia Rouse Avenue Court, Delhi-i anir ao anogo pungunü ayutsü atema temepishiba agütsü aser ibaji okadaki agizük.

Sorkar doctor temi CBI headquarters nung pa dak routine medical examination süogo ta osang ajanga ashi.

Delhi deputy chief minister apuba ajanga Aam Aadmi Party züngsemtemi lungkak aittsü ta bilemba agi Delhi aser linük kübok tesem aika nung security akangshiogo.

Hombarnü AAP züngsemtemi Sisodia apuba anema lungkak aitba sentong agidang state aika nung parnoki police den raratepa liasü.

Yaküm June ita taoba Delhi

health minister Satyendar Jain apuba sülen Opposition lennir tongti ka apubaji Sisodia lir.

Deobarnü CBI-i Delhi Dy. CM Sisodia dang ghonda 8 jungnüa asüngdangya asüba sülen pa apu.

Pa dang 2021-22 atema excise policy dak sendakba onük aika asüngdang. Iba policy nung tim masüba aika liasü aser AAP den sendaktepa alirtem dang tajangzük angu ta CBI-i ashir.

Sisodia-i telangzüba agütsüba nung CBI-i temulung masüaser pai bushisüngdang maparen den amalitep maliasü. Pai tongtipang onük aika atema kuli magütsü aser iba jagi pa apu, ta CBI ketdangsür kati ashi.

CBI-i Sisodia apuba ajanga Delhi sorkar ketdangsübaren nung timtem ajurutsü aser AAP o BJP-i aniba Centre sorkartem tsüngda tepila tuluba akümsü akok.

Delhi nung education aser health services jenjang tajungba

akümba atema Aam Aadmi Party (AAP)-i Sisodia aser Jain na nem tenüngsang agütsür. Tenati party jenjang tajungba kümdaktsü aser election nung takok anguba nung yaritep ta parnoki ashir. Anungji tena sorkar nung maliba ajanga Chief Minister Arvind Kejriwal inyaksangshi nung tetsükdaktsü ajurutsü ta ashir

Sisodia-i dak tai kecha meinyak aser pa apuba ya "dirty politics" ta Kejriwal-i metetdaktsüogo.

"Manish-i tai kecha meinyak. Pa apuba ya dirty politics lir. Iba ajanga nisungtem jashidaktsüogo. Nisungtemi reprangdar aser parnoki ajak angatetogo anungji telangzüba tajung agütsütsü. Iba ajanga onok tali tashi itshitsü" ta Kejriwal-i ashi.

"Iba ya democracy atema tammang anogo ka lir. Sisodia dak tai kecha mali aser iba ya tayang küpzükba politics lir" ta AAP-ia metetdaktsüogo.

### Centre-i Gujarat nem GST temenok Rs 9,136 crore agütsütsü lir

**Gandhinagar, February 27, 2023 (Agencies):** Centre sorkari Gujarat sorkar nem Rs 9,136 crore agütsütsü sentsüh lir ta Finance Minister Kanu Desai-i metetdaktsü.

Tesüiba küm ana Goods & Services Tax Act kübok takoksa anguba atema Centre-i sen agütsütsü ta Desai-i Hombarnü Gujarat Assembly nung ashi.

Congress MLA Arjun Modhwadia-i GST ozüng kübok taoba küm 2 tsüngda takoksa ajuruba atema Centre-i Gujarat

nem sen kwi agütsütsü lir ta asüngdangba langzüdang Desai-i iba ya metetdaktsü.

"January 2021 aser December 2021 tsüngda Centre-i Gujarat sorkar nem Rs 23,332 crore agütsütsü. Ano January 2022 aser June 2022 atema Centre-i Rs 7,068 crore agütsütsü. Anungji GST law kübok tesüiba küm ana tsüngda Gujarat-i Centre dang nungi Rs 30,400 crore angutsüla" ta Desai-isa ashi.

Iba atema May 31, 2022

nung Gujarat nem Rs 3,364 crore agütsü aser ano November 24, 2022 nung Rs 855 crore agütsüogo. Kasa mapang Covid-19 wara mapang Centre-i Gujarat sorkar nem Rs 17,045 crore aputsü aser iba atema Cess Fund nungi loan den sen tetemlok agütsütsü nangzüktep" ta paisa ashi.

Iba sülen Gujarat sorkari Centre dang nungi Rs 9,136 crore angutsü lir. Centre-i yakta Rs 3,377 crore agütsütsü akok ta Desai-isa shisem.



Bihar Assembly Budget Session mezüngbuba anogo Bihar Chief Minister Nitish Kumar aser Deputy Chief Minister Tejashwi Yadav na den tanga ketdangsürtem tangokba noksa nung angur.

### Italian PM Giorgia Meloni-i March 2 nü India semdangtsü

**New Delhi, February 27, 2023 (Agencies):** Italian Prime Minister Giorgia Meloni-i March 2, 2023 nü India semdangtsü aser Raisina Dialogue nung lai tongti tesemdang ama shilem agitsü.

Giorgia Meloni-isa Prime Minister Narendra Modi den senden ka amentsü ta external affairs ministry-i metetdaktsü.

Meloni-i anogo ananü atema India semdangtsü aser idangji deputy prime minister Antonio Tajani den shishilembar teshimtet telok kati la meina arutsü.

October 2018 nung taoba PM Giuseppe Conte-i India semdangba sülen PM Meloni-i tang semdangtsü.

Raisina Dialogue nung la tongti tesemdang asütsü aser lai okila jembitsü. Raisina Dialogue ya geopolitics aser geoeconomics indang tongti

mungdang lir. Giorgia Meloni-isa semdangba ajanga India aser Italy tsüngda tesentaktep akangshitsü, ta external affairs ministry-isa metetdaktsü.

March 2, 2023 nü Rashtrapati Bhawan indang forecourt nung PM Meloni pelaa agizüksü aser iba sülen lai Modi den senden ka amentsü.

Laisa External Affairs minister S Jaishankar aser President Droupadi Murmu na den ajuruteptsü.

Maneni, Italy minister for foreign affairs and international Tajani aser India commerce minister Piyush Goyal nati linük anaprong nungi shishilembar den senden ka amentsü.

India aser Italy tsüngda diplomatic relations tenzükba sülen taküm küm 75 buba lir.



Denmark Crown Prince Frederik Ander Henrik Christian aser Crown Princess Mary Elizabeth nati Rajghat, New Delhi nung Mahatma Gandhi nem aküm tetushi agütsüba noksa nung angur.

### PM-i PM-KISAN kübok aluyimertem nem sen crore 16,000 agütsü

**New Delhi, February 27 (Agencies):** Ato Kilonser Modi-i Hombarnü Karnataka kübok Belagavi nung PM-KISAN scheme nungi instalment 13buba ama sen crore 16,000 agütsüogo.

Centre-i 2019 küm amenokba Pradhan Mantri Kisan Samman Nidhi scheme kübok linük ajunga nung ali aliba aluyimertem kibong ajak nem instalment asem kuma lemsar sen 6,000 agütsür.

2019 küm February ita PM-Kisan scheme amenokba sülen tang tashi nung ali aliba aluyimertem crore 11 nem sen lakh crore 2.2 agüjatokogo.

Instalment 11 aser 12buba ya taoba küm May aser October ita agütsüogo. "PM-Kisan scheme ajanga linük ajunga nung aluyimertem nem tajangzük tulu agütsüogo aser tang iba instalment agütsüba ajanga aluyimba sector renloka aotsü atema teyari tulu agütsütsü," ta agriculture ministry-i Deobarnü sangdong ka ajanga metetdaktsü.

Ali aliba kibong ajak iba

scheme agitsü temsüa lir. Iba scheme yagi tetsür crore asem ajangzükdaktsüogo, shirnoki taoba küm pezü tsüngda sen crore 53,600 agizükogo.

Ministry-isa, PM-Kisan fund ajanga yimdak yimtsüng nung rongsenketzüng ajungkettsüogo aser aluyimertem sentsüh nung inyaksangshiba tajemba kümdaktsüba den agricultural investments ajungkettsüogo.

Ato Kilonser Narendra Modi-isa, iba district headquarters nung road show tulu ka ayongzükba agiogo.

Hombarnüsa PM-i Karnataka nung Shivamogga Airport semzüktsüogo.

Shivamogga ya chief minister Yediyurappa indang home district lir. Iba airport tasenba ya sen crore 450 intoka yangluogo. Airport kübok passenger terminal building nung ghonda shia passenger 300 achaayangtetsü.

Karnataka nung taküm May ita election agitsü lia Modi-i tang agi pongbubenbuba state semdang asütsü.



## TIR YIMYIM YIMOBILEM (EDITORIAL)

DIMAPUR SANGTENNÜ, TSÜKLAI (FEBRUARY) 28, 2022

### Ochiba school nung tatidang

**K**üm pungo shia election agiba ya kaketshirtem Ochi school nung küm pungo tashi zünger graduate asütsü tatidang agütsür amai lir. Aji oda, asenok ajak Ochi school nung ano taoba küm pungo tashi zünger yashi tatidang agütsüogo. Atangji, asenok azungba Ochi school nung ochi subject nung takok angutsüba ya temela masü, kanga tasak. Iba jagi anarongdena kari dang takok nguteter aser aikati tamakok angur. Taoba küm pungo tashi asenok ochi school nung class agi shia kechisüdir süaka asenok lokti aser yimten nung ochishia alitsü indang sensaksama aruogo aser talisa, election mapang pei temeten mayoktsü, tashiyim mamshitsü aser election inyakyim ajak merükmerüka agitsüba indang tenla kidang aser lokti senden aika nung tesayurtemi tangatetba tajung aika agüja aruogo. Iba denji ken aser sangro mejemertemi asenok ajak ochiba election nung takok ngua shilem agir tajung kaka asütsü asoshi tangatetba aser tayongzükba o agüja aruogo. Ano asenoki melamelaa angatettsüsa jilushi aiertemia Ochiba election indang jilushi tajung aika ia asenok nem reprangdaksüogo. Iba denji Ochiba School ya Khristan school asünungji, mapang mapang shia asenok lumia sarasademba mapanga agiogo aser tang tesüsa asenok final tatidang agütsütsü anogo ishika lia, ABAM-i dena election nung tokteptsü purtem Impuri jaoka sarasadem mapang agiogo. Atangji, iba tashi nungji asenok teimbaka kanga junga takok nguogo, kechiyong itemji 'theory class' tem dang liasü. Ajisüaka, tesasatsüka asenok tokolok tajung aser tangateterem aika yashi agiba Ochiba school 'practical class' nung takok menguteti tsükogo, anungji ano kasa Ochiba school nung küm pungo lepshia azungtsüsa akümstsü. Asenok ajak Ochiba School tatidang nung jembiba aser züluba nungbo takok angur saka asenoki angazükba mapaküma benshitsuäba tatidang nung takok mangur ta asübaji, tang amai tamakok nguli khen meyipa reprangdanga bilemdang nung asenoki tamakok anguba kulitemji asenoksasa rajemtsü. Atangji, Ochiba school nung azungtsü aser takok angutsübaji kodanga temenu maka, anungji ano tanü nungi asenok iba kasa school nung tali temulung tagütsüba agüja azung tenzükdi. Kodang asenoki asenok Ochiba school nung tamakok anguba indang kuli bushidangdir, asenok dak malangba jenjang aser asenok dak malangba rongsen asenoki anibelem kecha magii angati mesüra tashiyim agi agitsü merangba ajanga tamakok angur ta angatettsü. Ibaji kecha memetet aser mangazük ser takok ngunüba agi tatidang nung ajizüka züluba amai lir. Aji oda, Ochiba school nung takok ngua zungtetsü atema asenok nisung shia pei taküm aser kibong mesütsü asoshi mazüngi inyakba mapa kakabosa akatsüla. Iba jagi asenok nem asen taküm akhümketa aser nümadangteta alitsüsa tashi aser tangatetba agütsütsü. Iba jagi asen taküm nungdakbo peritsüsa asenoki asenoksasa inyaktettsü. Iba jagi asenok kiojen yanglutsü, jangotsü aser abensüoshi alitsü, tanurtem kaketreju balala nung zungdaksütsü aser manemshiluba mapang asenoksasa asenok yaritettsüsa asenok dak tashi alitsü. Tanü asenok ochiba school tatidang nung takok mengutetba ya asenok tokolok majungba agi mesüra mangatetba agi masü saka kuli tulutibaji asenok mapa maka kazüba agi lir. Aji oda, election-i aiertema peisasa aaba ajanga nübortem mesütsüsa kecha mapa maka aser nübortema pei taküm aser kibong nungdakbo peria ngutettsüsa inyakba mapa kata maka ta election-i aiertem o vote agütsürtem na prongla, peisasa pei tebok mesungtet, Delhi nungi aruba sen agi lenirtem teimba aser nübortem eshinba ta mapa meinyak ser lemdanga agitsü bilemba jenjang nung aliba ajanga lir. Ashi, Delhi nungi aruba sen agi asenok nungdak kechi inyaksü tim aji shitak inyaker, asenoka asen nungdakbo peritsüsa anogo shia inyakba mapa kakabosa yimsüsür aser nübortem shia inyaka ali nungbo, election nung sen alemtsü aser vote ayoktsü indang bilemstsü shisatsüa marutsü aser mapanga malitsü. Iba nungdak ya mapa kuma inyaksüsa taküm nungibo asenok meyong Ochiba school nung ano tezü medangi maneni sayutsü, angazüktsü aser mapa kuma inyaksü merangdi.

## OLEMSABANG

### MAPA TAJUNG INYAK MEDEM, SAKA MABENSA LIASÜ

~ Senti Tzudir, Tizit Town.

(Yashi adok nungi...)

Ao Baptist Arogo Pastor fellowship küpok aliba pastor tem ajanga Local Arogotem nung aliba Toklang tenzükertem ajak ayongzüktsü tashi Kong nungi angu? Aser panok nem shepai tashi agütsü? Bendang lima indang Ken toktsudi. Asen Naga lima nung aliba yimsüsüba menden ajak senteper menden 60 lir. Aser iba telongjem dangji Member of Legislative Assembly ta ajar. (Government of Nagaland). Asen State bo tilakadang, aser India nunger küpok sa alir asünung State Government ya-a küm nungi küm piyong asoshi State budget plan, Sen tarulen aser tentoktsü len ta ongko inyaka yanglur nüburtem asoshi sorkar mapa ji abener, yamaji asenok Nagaland state ya Christian state asü nung Center nungi Arogo asoshi bo budget plan, Sorkar Senpong sentong nung kodanga menokdaksür asenoka India bo India nunger sa surung per lenisuba küpok sa alir asünung. Naga nunger Cabinet Minister's temi parnok jia küsa Christian tamanger bo küsa tamangertem sa surnung, parnoki Arogo tem asoshi bo Senpong nung Sen (Budget) inoka sentong mayangluteter.

Tamanger bo tamanger sa, Saka Arogo lokdi ososhi Yimden senpong nung inoka yanglutsü merajemer. Aser aji shibai nunga ta ashitsü. Minister temi tamanger tem aliba Arogo asoshi Center Sorkar den tasü ita nokdaka jembiba ajangshia mali. Saka India nung kodang Narendra Modi (BJP) Sorkar mapa inyakyim ya bilemdangdir, pai par lima nungbo Central aser State fund amshia parnok meyong, Hindu tekülemdak tajung yanglur semzüka agiba tesüba küm asenoki metetogo.

Saka asenok Christian tem yabo Local Arogotem ajak küm nungi küm piyong inyaka aotsu asoshi budget yanglur Lim Arogo lokdi ji bener aoer. Central mesura State Government dak rangloker abenba Arogo masü. ABAM küm tatem mungdang Dt 17-18th December 2022 nung liasü. Süra iba küm tatem mungdang nung approved süa maliba ka parnok angazükshiba Sentong nung Agenda ka parnoki lemtet agibaji tai, Khuret ka bener senshidaksu. Anungi maka mait Arogo nung tenzükter pastor tem rongnung karbo tepang agi rasa-a meshitet timtem ajurogo sudi. Ibaji ozü Arogo nung, mesura Par Arogo nung atalokogo ta ashirba masü Saka Pastor tem rongnungi shirnok tanü Arogo tila aser rongsen ketsung angulen sadem a maka timtema lir ibajibo parnok-i dang pei aliba Arogo tia ji meteta lir. Arogo tila tem indang kodang aroka bilemtanger, Arogo tila tem aikadi Arogo nung Home evangelist meyuteter (Kiboksem asoshi) Anungji item pastor temjibo home mission mapa dena repa inyaksu sa akümer, iba ji dang masü saka Arogo küpok aliba full time Staffs Salary (Ita Sen) agütsütsü asoshia Deacon Board den külemi rongsen Lemang bushiba mapa nung küret abenba Sannüker aika tanü tashi asen Ao Lima Arogo tem nung lir.

Tanü nubur tem rongnung kari yamai jembir, Nenok Arogo tulu aser kibong aika, anungji kangasa timtema aser meranga inyakdar. Saka yamaji kodanga masü. Arogo toluwa suang, tila-a suang. Arogo-a ta asürji, ajak dak meshi melung bo küsadang keta lir. Yamaji tanü Alima potu tasenba nung Arogo tejakleni dangar Arogo tem den jangyu medema aotsu asoshi inyaksü merangdang, maka mait Arogo nung tenzükter pastor tem aikadi ola matoki timtim jendi agia tenzükter, item ama tia nung aliba pastor tem dang ya shiner Shirnoki tenzükba wadang nung, maka mait tia ajuruaka, timtem arema tenzükdaki, nenok taküm aser kibong Tsüngremi moatsütsü, Kechiyong kodang nenok külem Aoer Pastor telungjem rongnung senzür idangji nenoki aiben nung takar Arogo nungi aruba ki küsa külem tenzükter pastor tem den o aika ontepa aser toktepa mejempitetsu akok. Saka iba dangji taremzük akaba Sannüker ta ajar.

Ao Baptist Arogo Sannüker telungiem ajanga ayongzüka agiba sentong ji jakdaka tai ta aitsur masü, saka küm pezü ser ita ter jia tokjang, saka küm ka danga Jelua iba jakdang nungi inyak asübo Koda jungla. Arogo nung lalu shipong ta asübaji tezü tener kodanga martsü saka iba mesuk ji dang arutsü. Candidates temi telung nung pei mapa ajak inyaka toker külen ayongzüka agi asü nungji ba sentong ajanga takok ngutetba aser sungjang tajung atangba tamaitu kecha mangutet. Kechiyong mapangji menua toker liasü, Kechi mapa südir suang, saka Tamakoker ka ama majurudang mera ji agia atoktsu nungdaker. (Prevention is better than Cure).

Yaküm iba küsa Olemsapang tapak nung yamai ka zülua aliba angu. Mokokchung Dist. küpok aliba MLA, Tatar menden ajak agi 10 lir, anungji parnoki parnok lenisuba küpok ajanga aruba project plan Sen kaba dang LADF ta ajatsu akok, iba sen nungi 10 percent bo CTC atema tenla agutsutsu junger ta zülua aliba asenoki zungshiogo. Saka tezülur jaki koba tangatetba nung zülü ibajibo pai dang metet. Saka pa ji shiba, aser pa ji Kong kechi nung inyaker Ken kanga junga pei sa-sa bilemdangtsu nungdaker. Asen Ao Lima aliba Clark theological college yabo Kanga akümstsüpa ayutsu tim. Iba College yabo asen Aoer ajak atema senmang ta angatettsüla. Ya sur bo iba College koba asen Lima Aolichen nung amenoka lir, iba dak sendakba nung talisa Rongsen kettsung asoshi mesura terenlok mapa atema-a sang iba shisaliok reju ketdangpur majangi osang kakat tem nung pei kijai tongtetba kisung nung rangloker mashi mezülü tajungba asütsü ama bilemer.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## Uganda nung police temi Khristan tanur 40 kumzük



Arua, Uganda nung February 2, 2023 nü police temi Siraji Sabiri pua aliba noksa nung angur.

**Nairobi, Tsüklai/February 27 (Agencies):** Uganda nung Muslim nunger kati Khristan charity kati education angadi agütsür ama Khristan tanur 40 mesüzükba dak sendakba nung nisung ana apu.

Uganda northwest tsütsü West Nile Sub-Region kübok Arua tesem nung mezüing bushisüngdangba mapang arishi küm 27 tain Muslim nunger Siraji Sabiri-i school scholarships agütsütsü nangzüker tanurtem hotel kati mesüzüka anir ao aser Democratic Republic of Congo nung sorkar anemba telungpur telok ka dang ayoktsü sentong liasü, ta ashi.

February 2 nü police temi hotel nungi tanur 40 kumzük.

Arua nung pastor kati iba ashikülak sentong indang ya arogo züngsemtem nungi angashi. Central Uganda nung Luwero District nung aliba school ka atema Khristanpur lokti tentet kati tanurtem

scholarship atema tenüing zülutener, ta parnok i ashi. Sabiri ya Luwero anasa Wakiso District nung alir.

"Anungji tsürabur temi iba maangka amshia iba amala scholarship atema tenüing agütsü," ta pastor-i security mechi pa tenüing miimshia ashi.

"February 2 nü arogo züngsem tain kati küdang West Nile Sub-Region nung aliba Arua jila nung Continental Hotel ka nung arogo ka nungi tanur aika aliba indang ashi. Ni shisabolua bilem, anungji ni police dang tanurtem repringtsü ashi, kechiaser iba inyakyim nung ni maden," ta pai ashi.

Police temi iba hotel yagi ao, kong arishi küm 5 nungi 16 tsüngta tanurtem angu aser parnok Democratic Republic of Congo leni aoba bus ka jembia lir ta angazük, ta pastor-i ashi.

Bushisüngdangba mapang lenir Sabiri ya Khristan masü saka Muslim nunger ka ta putet.

"Nisungba ya Khristan ka ama inyaksangshi, anungji pai teyari agütsütsü tenüing nung tanur 40 dak tema tenüing benden, saka pa tebilembabo Congo nung aliba ADF [Allied Democratic Forces] dang ayoktsü liasü," ta pastor-i ashi.

Arua nung city commissioner Alice Akello, shiba district nung sorkar meyong sepaitem ajak madak kibur lir, lai tanur arishi küm pongu tashi hotel nung nguteta süngmang aser Sabiri dang parnok kongi ao ta asüngdang, ta ashi.

"Mezüngbo Sabiri-i tanurtem ya Bombo, Luwero Distrit nung aliba Al-Rahman Islamic Primary and Secondary School-i anir aor ta ashi. Saka mapang talangka asüngdangyaba sülen iba ama tenüing nung school kata mali ta putet," ta Akello-i ashi.

Akello-i Sabiri aputsü totuyuba agütsü, shiba iba tasa inyaksü aser tanurtem anidentsü atema Wakiso District nungi northwest Uganda nung mile 295 shi arua liasü, ta lai ashi.

Iba dak sendakba nung ano arishi küm 28 tain Muslim tsür Salima Geriya liasü, shiba Arua nung okadak nokdak aser Sabiri den külemi tepuokdak lir. Ken o metembang, kechiaser police temi ano parnok den sendaktepa nisung ali-mali bushiba mapang lir.

Tanurtem ya pua bener otet asübo arogo aser nürburtem dak kanga sashia kongshitsü liasü, ta pastor-i ashi.

"Uganda nung arogopur ajak dang tanurtem yaritsü tenüing nung mejangjaba nisungtem aruba mita alitsü ajungshir," ta pai ashi aser tanurtem kumzükba asoshi Tsüngrem dang pelaba lemsatepa liasü.

## Khristan medical ministry kati züngsemtem ashioktsü: FBI

**Washington, Tsüklai/February 27 (Agencies):** Obamacare agütsüba Khristan ministry kati sen million \$4 jenjang medical bills magütsü ashioktsü, ta FBI ajanga tai tongloksü.

Danga Khristanpur timtem nung alirtem yaritsü asoshi ita shia sen agütsütsü aser iba melena medical bill agütsütsü ta Medical Cost Sharing (MCS) ministry ajanga nangzükba ama meinyak, ta ashir.

Ajisüaka MCS züngsemtem nem kuli balala mechi teyari magütsü züngsem aika indang medical bill sen dollar meyirijang aika memonok yutsü, ta FBI search warrant nung shia liasü.

MCS kibur Craig Reynolds aser James McGinnis nati züngsem saru ama sen million \$7.5 bendenba nungi sen million \$4 ashikülaka agia züngsem

indang medical expenses asoshi sen \$250,000 (shilem 3.2) dang yutsü, ta FBI-i tai tongloksü. Reynolds-i yamaji meinyak ta ashir.

Ano MCS yagi 2021 nungi tenzüka par züngsem nem senotsü teyari magütsü, ta federal prosecutor temi ashir.

MCS anema mapa tamajung inyakba ken o kata mebenokaka Justice Department ajanga company anema company mapa meinyaki atatsü ken o benok aser par website shibangtsü.

Kansas City Star ajanga ashiba agi, züngsem indang bill memonoktsüba tatishitsü tajung kaji Missouri tsür ka heart attack ajuruba sülen la indang medical bill \$45,000 magütsü yutsüba lir.

Züngsem tem indang bill memonok yutsüba tatishitsü kar FBI-i athishia ashi aser item rongnung mashisa tetsür anati

tanur asoba indang bill MCS yagi menoktsütsü ta bilem, kechiaser company indang promotional material nung 'tanur asor densema pre-existing conditions ajak indang anogo ka nungi tenzüka menoktsütsü' ta shia liasü. Ajisüaka tanur asoba sülen tetsür ana dangi bill sen \$15,000 shi jungnüa indang aru.

Ano züngsem ka stroke asüba sülen mozü kidang amungba bill \$125,000 aru, ta ashir. Lai züngsem saru sen \$11,000 agüjaka company ajanga la nem teyari magütsü. Tetsür la dak blood pressure aliba ajanga la indang application nung tiazü ashi, ta MCS-i aitsür.

California aser Missouri Attorneys General-i yaria bill tera ajemtsü saka MCS-i sen \$15,000 menoktsütsü lemtetba sülen lai sen \$20,000 menoktsüsa akumer.

## ANO GO ABEN TSÜNGREM DEN

### Tebenja Mangdang

- T. Ken 73: 1 - 12.

Iba lima nung asenoki kechi angur iba jagi shisabuludaktsü dang iba ken ya züngang "Atangji Tsüngremi Israel dang ajunger, au, temulungsentsü merüka alir dang ajunger" ( t. 1). Asaphi Israel Tsüngrem dak amang aser taküm temerük alir Tsüngremi akhüm tsübur aser moatsür ta pai amang. Saka tekong ana nung pai pa tenük Tsüngrem nungi meyip, aser pa meketa alir tangar repringtsü tenzük. "Saka nibo, kü tetsüng talang ka oadoker liasü, kü jenjang ajujitsü anasa liasü. Kechiaser ni tamajung pur azükaru nung angudang, ni shisa makar dak tenük merem" ( t. 2,3).

Asenoki yangi Asaph tebilemetsü tongtipang ana angur. Mezüngbuba, pa mangdang nung langka tai liasü. Pai Tsüngrem dak mereprangi pa meketa alir tamajung pur dak repring. Itemji shirnok liasü? Pai itemji tekong 4 - 9 nungji rasaa ashir." Parnok asüba nung tekangshi mali: saka mebenshi" ( t. 4). Parnok meshiranger; parnoki tangar nem agütsütsü mali. Parnok timatemer, parnoki asüakümer aser azü tokshir. "Temo agi parnok tenük lungtetter temulung agi aginüba dak tali parnok kar" (t.7), au, parnok teraksa lir. Parnoki Tsüngrem anema jembir. " Sünga aliba aliba marok nungi parnoki tzü mesepzüker" ( t. 10). Asaph tzü tako jemya liasü. Pa mangdang nung tebenja liasü. Kodang asenoki tamang agi masü tanguba agi jajadir yamaji ataloker.

Tanabuba, pa tangatetba nung langka tai liasü. " Ni shisa makar dak tenük merema liasü" ( T. 3). Tsüngrem memeteter azükarur ta pai bilem asü ? Pa tangatetba melenshi asü? Ken zülur alima jenjang nung liasü, tarutsü aliba jenjang nung masü. Parnok " rongsen renlok" (t. 12)- saka kechi ama rongsen? Kodang ne tsüng ajujidir Tsüngrem indang aser Pa sorkar indang tasüngdangba adokdir, ne mangdang aser yimya repringshiang.

Tamang taküm ka alitsü asoshi Tsüngremi alima nung mapa inyakba angatettsü tenüngdaksü. Tanguba agi masü saka tamang agi jajatsüla. Ne tenük Kibuba dak yuang, aser alima yimya den hai-aura teka. Moatsütsü Tsüngrem tamang katetba lir. " Tsüngrem yimli aser Pa temeshiba tama bushiang, aser ajak Pai ne nem enloktsütsü" (Matt. 6:33).

## Iran sorkari tepuokdak alir Khristan ana dang tai atok

**February 27, 2023:** Iran 'Zionist' Christianity" sorkari Muslim yimsü toktsür ajungkettsüba ajanga linük Khristan yimsü agizükba atema security anema inyakogo, ta aija tepuokdak puoka aliba tepuokdak puoka liasü.

Khristan anapronglaji Iran nung jail tamajungtiba- Evin prison nung puoka liasü. Tesüiba küm ishika tsüngda iba jail nung Khristan aika puokogo.

Iran nungbo Islam yimsü toktsür Khristan yimsü agizükertemji Khristan ama mezüngshir aser Khristan yimsü benshitsu atema temeden magütsür.

Tang Hadi aser Saheb na chioka parnok kibong den longjemba ya Khristanem atema tepelatsü osang ka lir, ajisüaka Islam yimsü toktsür Khrista agizükertemji Khristan ama Iran nung aliba jail balala nung timtemdar, ta ICC-isa metetdaksü.

**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Paipalem**

(adj) nüchi amato masü jembishinüba (confuse)

\* Tantsür tambur akümdang **paipalema** aoer.

**Paitok**

(adj) paia ao, merütok (divert)

\* Pai parnok **paidoker** tanga lenmangi ao.

**OLONG PAITEP # 6442**

15x15 crossword grid with numbers 1-15 indicating starting positions for clues.

**TIPIEN**

- 1. Balaka - (5)
- 6. Aika shirangba - (4)
- 7. Tar tatsü - (6)
- 9. Nenü'er jabaso - (4)
- 10. Sen latettsüba - (7)
- 11. Tangar kübok alir - (4)
- 14. Lon nung inokba - (6)
- 15. Tzü ayimdak - (4)
- 16. Ajok - (5)

**LANGTSÜNGLEN**

- 2. Hai sür inyak - (4)
- 3. Aor tenüng ka - (6)
- 4. Ali telungi talangka lur - (5)
- 5. Tebang kenyongi mazüoker - (4)
- 8. Ken atema anenzükertem - (5)
- 9. Toktepa noktak - (5)
- 10. Sen - (6)
- 11. Benjong agi - (5)
- 12. Telung nung rizünga ayu - (4)
- 13. Tebang nung enok - (4)

**OLONG PAITEP # 6441 TELANGZÜBA**

**TIPIEN :**

- 1. Aben, 4. Artsü, 7. Lisem,
- 8. Liwa, 9. Sarasadem,
- 12. Aket, 14. Mangu, 15. Anünü,
- 16. Ango.

**LANGTSÜNGLEN :**

- 1. Aruli, 3. Balala, 5. Suwar,
- 6. Belem, 9. Sujuk, 10. Aonung,
- 11. Dokan,
- 13. Tinu.



**Kanga janasemponga sobur tambur ka Arogo office ka nung :**

**Tambur** : Hai tetsür, ni iba tamagitsü Arogo nung member kümnera azü-ak.

**Tetsür** : Iba ama osü tamajung idagi mejembir akoti, ya Tsüngrem ki ako.

**Tambur** : Wa, ni kechi o tamajung jemi aka? Pasrorba lira jaang, ni nenok tamagitsü tetsür tanur den mejembijar.

(Tetsürla jagi yakta dang oagi Pastorba dang situationji shir anir arur)

**Pastor** : Kwa adianu, na kechi aginer?

**Tambur** : Haet saala, ni yashi lottery ka nung sen million tenem, fifty million anguba agi iba tamagitsü Arogo nung ya ter shilem den tenla kar agütsünüba agi nia member kümndi ahanung iba tetsür tanur yagi junga manepalur ati.

**Pastor** : Ayaya, ayanutsür, kudasür yamaji tim masü doktsür, Sir, arungma, Arogoibo nenok ama tantsür tambur ang nüngdaker ato, Tsüngrem tsüngdangbo rongsenji tongtipang masü saka tanüla kajiang senti nung koda, arung arung oba!

**Moral : Sen/rongsen akarbo ajaki asener.**

~ Lilir : WhatsApp

**BJP aser NPP lennirtemi Meghalaya nung sorkar akümtsü amanger**

**Shillong, February 27, 2023 (Agencies):** Meghalaya nung BJP-i tanga party tem külemi sorkar akümtsü ta BJP state president Ernest Mawrie-i ashi.

Meghalaya nung taruba sorkar akümba nung BJP kanga tongtipang asütsü aser onok medeni sorkar akümtsü makok, ta pai ashi.

Meghalaya nung maneni

teloktep sorkar akümtsü. BJP-i sorkar kümra Assam ama terenlok jenti alitsü ta Ernest Mawrie-i ashi.

BJP-i tesüiba nunga parnoki anir teloktep sorkar ka akümtsü ta shiogo saka koba party den sendaktepa akümtsü'ar mashi.

Külen, Chief Minister Conrad Sangma-ia National People's Party (NPP) ajanga maneni sorkar akümtsü ta ashi.

Tura nung aliba Walbakgre polling station nung vote enoktsüba sülen Conrad-i osangbener den jembidang iba osang metetdaksü.

"Onoki sorkar akümtsü tashi angutsü" ta pai ashi.

Taküm assembly election nung NPP-i menden 60 nungi 57 nung tokteper saka BJP-ibo menden 60 prong nung tokteper.

**AAP züngsemtemi BJP office, Guwahati kima lungkak ait**

**Guwahati, February 27, 2023 (Agencies):** Delhi Deputy Chief Minister Manish Sisodia apuba anema Guwahati nung Aam Aadmi Party (AAP) lennirtem aser züngsemtemi BJP headquarters kima nung lungkak ait.

Central Bureau of Investigation (CBI)-i February 26 nü Sisodia apu.

AAP züngsemtemi "BJP Sarkar Go Back" ta ayima

lungkak ait aser Sisodia chiochtsü takhangba agütsü. Iba mapang police-i lungkak aiter kar apu.

"CBI ketdangsür aikati Manish Sisodia apuba anema noktak ta ni angashiogo. Parnok ajaki pa akhümtsübur aser pa anema kuli kecha mali, saka political pressure ajanga CBI-i pa aputsüsa aküm" ta CM Arvind Kejriwal-i ashi.

Sibsagar MLA aser regional party Rajior Dal President Akhil

Gogoi-ia Sisodia apuba aitsüogo.

India nung opposition lennirtemi iba inyakyim anema ola adoktsü mepishir, ta Gogoi-i par medemer Sisodia pusema ashi.

Sisodia ya Delhi nung Finance, Excise & Education Minister lir aser yashi Central Bureau of Investigation (CBI)-i ghonda 9 tashi asüngdanga asüba sülen apu.

**Churachandpur district nung Kuki telungpur ka apu**

**Imphal, February 27, 2023 (Agencies):** Manipur police-i Churachandpur district kübok Selbuhjang yimdak Kuki National Front (Nehlung) züngsem ka apu.

Iba nisung ya Seiminlal Dimngel (Lalboi -Michael) ta jangjaogo aser Sangaikot police

telok kati ghonda ana shi bushitepa aoba sülen apu.

Pa dang asüngdangya asüadang Kangpokpi district kübok Saikul tesem nung pai shishilembartem aser dokan kiburtem dang nungi tashiyim agi sen meshiba shiditem agütsüba

nanzüikogo.

July 2022 nung pa den külemi nisung 18-i Kuki National Front-Nehlung (KNF-N) nung aden aser parnokji chairman Henkholen Kipgen (James Kipgen) ajanga aniok ta paisa nangzüik.

**Assam nung tetsü kati jabaso teyari agia la kinungbo tepset**

**Mangaldoi, February 27, 2023 (Agencies):** Guwahati nung nisung ana külemi tepsetba sülen ano Assam nung kinungtsü kati lar jabaso teyari agia la kinungbo tepset.

Tetsü o jabaso nati aou süng aser nok ka ajanga tepset. Iba sülen tenati tasü mangji mi agi rongdok aser mitsüji ayong ka

nung endok.

Iba lendong ya Darrang district kübok Kalaigaon nung atalok.

Tetsürlaji Purnima Nath aser lar jabasoji Mitu Nath ta jangjaog. Tenati tepsetba nisungji Horuram Nath liasü.

Assam police-i February 23 nü tasü mang rongdokba nungi

shilem tila ka ngutetogo.

Iba sülen police-i tetsü o jabaso na apu aser tena dang asüngdangya asüadang tenati tepsetba nangzüik.

Tenati February 18 nü Horuram Nath tepsetba nangzüikogo aser iba atema ken o ka benokogo ta Assam police-i metetdaksü.

**Taküm samaba polling officer kibong nem Rs 15 lakh agütsür**

**Shillong, February 27, 2023 (Agencies):** Meghalaya nung Honibarnü gari lendong ka nung polling officer Chesham Ch Marak tsükset aser iba atema Meghalaya Election Department-i par kibong nem Rs 15 lakh teyari agütsür.

Chesham Ch Marak den tanga ketdangsürtem parnok mapa lemzüikba 44-Raksamgre Assembly Constituency kübok 44/8 Jangrapara LP School-i

aodang Photamati nung parnok amenba gari tsükok.

Iba lendong atalokba sülen ketdangsürtem aser security personnel tem Tikrikilla community health centre-i anir ao saka idak nung jagi Chesham Ch Marak aser pa den külem ketdangsürtem Goalpara nung mozü ki kati anir yok. Chesham ya second polling officer liasü aser lendong nung pa tekolak yiru aser

Guwahati-i anir ao saka pa süadok.

"Marak kanga dang ajungbena asüba atema mangyimer. Pa ya tenendak aser bendanga agütsüba ketdangsür ka liasü aser democracy atema noktaker ka liasü" ta CEO FR Kharkongor-i metetdaksü.

CEO Kharkongor-isa Marak'er kibong den asükuh lemsatepba metetdaksü.



Guwahati police-i nung nisung asem ket nung heroin seret 1.056 apuba sülen agiba noksa angur. Guwahati police-i Basistha tesem nung mita aodang Rs 8 crore alangba heroin angu aser iba dak sendakba nung nisung asem- Abdul Rosid, Mujammil Haque aser Md Zamal Ali nung puogo. (Guwahati, February 27)



Sri Lanka opposition National People's Power züngsem temi Colombo nung longkak aitba senshidaktsütsü asoshi police temi water cannon tem amshiba noksa nung angur. Linük rongsenketzung jenjang majungba ajanga local election anogo thinentsü sorkari telemtetba agiba mechi opposition telok temi longkak aiter.

## Italy anasa refugee bena aliba rong mükepök, nisung jenti asü

**Crotone, Tsüklai/February 27 (Agencies):** Refugee bena aliba rong ka Calabria southern region nung Italy tzükum nung aliba Crotone yimti anasa mükepoka tanur 12 densema nisung 62 asü.

Iba rong ya anogo ishika jakdang Turkey nungi ayamesoa liasü, kong Afghanistan, Iran aser danga linüktem nungi refugee tem mena liasü aser Deobarnü Calabria anüdok tzükum nung aliba Steccato di Cutro anasa yipru tesashi nung mükepök.

Nisung 81 takum kumzükka lir aser item rongnung par 20 mozü kidang temang anepalud, ta provincial sorkar ketdangsur Manuela Curra-i ashi.

Migrant tem shibelenba ken o nung nisung takum kumzükka alir ka pua lir, ta Guardia di Finanza customs police ajanga ashi.

Asürtem rongnung tetsür aser tanurtem densema lir aser tanurtem asüba tejangja monguteter, ta Cutro mayor Antonio Ceraso-i ashi.

Curra-i ashiba agi rong ya Turkey anüdoklen Izmir tesem nungi anogo asem mesüra pezü

tejakdang ayameso aser rong nung nisung 140-150 liasü ta takum kumzükker temi ashir.

Takum kumzükker ya timba Afghanistan nungi lir, aser Pakistan nungi kar, Somalia nungia ana lir, aser asürtem mejangjateter, ta lai ashi.

"Migrant tem ya aika Afghanistan aser Iran nung timtema aliba nungi jena aru," ta Italy Tir Sergio Mattarella-i ashi.

Refugee tem kumzükba nung mangatetep aliba ozüing tasen ka Italy indang hard-right sorkari agizükker anogo ishika lir iba lendong ya ataloker.

Iba ozüing yagi tekumzükba rong temi mapang ka nung nisungtem khen dang kumzüktsü merangtsü melar, aser iba mechi central Mediterranean nung tzü nung arakseta asür timba akumtsü, ta iba ozüing anemer temi aitsür.

Refugee tem Italy tzükum tonga aruba ajemdaktsütsü nangzükba mechi taoba küm September ita far-right Ato Kilonser Giorgia Meloni ya shimteta liasü.

Deobarnü sangdong ka

nung lai iba tatalokba atema tejashi lemsatepa liasü aser nisung shibelener temi meimchir arishi ajemtsür ta ashi.

Interior Minister Matteo Piantedosi-ia sangdong ka nung iba tatalokba ya lendong tuluka lir aser iba atema migration channel tem anema mera tesashi agitsü nüngdaker, ta ashi.

Refugee temeden asoshi nokdaker Pope Francis-ia iba lendong ajurur alirtem asoshi sarasademtsür, ta St Peter's Square nung Deobarnü nürburtem den jembidang shia liasü.

European Commission Tir Ursula von der Leyen-ia iba lendong asoshi temolung taroktiba nung jashir ta ashi aser EU asylum ozüing tasen kuma yanglushitsü ayongzük.

"Asenoki (EU) Pact on Migration and Asylum aser Action Plan on the Central Mediterranean nung asendenshir temolung agütsütsüla," ta lai Twitter nung zülua liasü.

Refugee tem tzüyim ajanga Europe-i aittsü merangertem timba Italy nung anener.

## Israel settlers temi West Bank nung ki aser gari rongtoktsü

**Jerusalem, Tsüklai/February 27 (Agencies):** Palestine nunger kati Israel nunger settler ana tepsetba sülen Israel nunger settler temi West Bank nung Palestine nunger yimtsüngtem maka liasü.

Nablus anasa iba lendong nung Palestine nunger ka asü aser nisung 100 dak tema yirua liasü, ta Palestinian health ministry-i ashi.

Kasa mapang nung gari aser kitema aika rongtoktsüogo, ta local ketdangsurtemi ashi.

Settlement ka nungi adinu ana highway ka nung tepsetba sülen iba lendong ya ataloka liasü.

Israel military-i ashiba agi, parnoki Hillel Yaniv, 22, aser Yagel Yaniv, 20 na tepsetba Palestine nunger ya tang tashi bushidar aser bushisüngdangtsü atema sepia talila anisemogo.

Deobarnü Israel aser Palestine nunger ketdangsurtemi Jordan nung summit amenba mapang mangatetep aliba bentettsü atema bangjema liasü.

Summit tembangba sülen ghonda ishika lir sayaba video ka nung Israel nunger settler tem Nablus nungi km 6 shi pilar aliba Hawara yimtsüngi mi tsükloka bener long ona aiba sayuogo.

Nablus tesem nung settlement tem asadanga aliba Palestine nunger ketdangsur Ghassan Daghlis-i Palestinian Wafa news agency dang ashiba agi, ki 30 long agi onsatsüba den terongtoka rongtoktsüogo aser garia 15 rongtoktsüogo.

Settler temisa Burin nunga

jen ka aser gari asem rongtoktsü aser Asira al-Qabaliyya nung ki ka aser tzü tank ka rongtokja liasü, ta pai ashi.

Palestinian health ministry-i ashiba agi, Zaatara nung settler temi amakba sülen arishi küm 37 tain Sameh Aqtash dak tepok nung injang agi kha-a süogo.

West Bank nung iba tesem ya Israel-i azüoker aser parnok kümzükka meyutetba atema Palestine nungertemi Israel security force aitsüogo.

Palestine tir Mahmoud Abbas-i, iba lendong atalokba ya Israel sorkar dak tai tongloktsüogo aser ashiba agi, Israeli occupation forces tawabangba kübok Israel nunger settler temi iba kiralongrar mapa inyakogo.

Israel Ato Kilonser, Benjamin Netanyahu-i settler tem dang süngjemshitsü aser Israel military aser security force tem nem Israel nunger tepsetertem bushitsü atema tetsüdaktsü tagütsü, ta ashi.

Israel nunger adianu ana ya Hawara ajanga oya aliba mapang Palestine nunger kati tena mena aliba gari dak atsük aser iba sülen khaseta liasü.

Settler temi mang ayangtsü atema Hawara-i jajayonga aotsü atema ayongzük. Adianu ana ya Har Bracha settlement nung alir koba Nablus nungi 1.2 miles (2km) pilar lir.

Palestine nunger telungpur telok kati danga nisung tepsetba nangzükka mali, ajisüaka iba nisungba yagi Nablus-based Lions' Den indang insignia keter aliba tola ka semer liasü, ta osang ajanga metetdaktsüogo.

## Nigeria tir election nung Obi-i tongtipang Lagos state ngutet

**Abuja, Tsüklai/February 27 (Agencies):** Nigeria tir asoshi tokteper Peter Obi-i Lagos state nung vote timba ngutet, kong Africa nung yimti tulutiba lir.

Labour Party nungi Obi-i vote 582,454 ngutet aser All Progressives Congress (APC) party nungi taoba Lagos Governor Bola Tinubu-i vote 572,606 ngua liasü, ta Hombarnü electoral commission data ajanga sayur.

Taoba mapang Lagos ya Tinubu'er telok timba aliba tesem ka liasü.

Obi nübuyim nung lanur aser jila nung alirtem atsür aru, shirnok akhi mapang nungi amshia aruba ochimashi yimtenren agi lakteter lir. Parnoki vote agütsürtem dang party ana magizüktsü ayongzük, shirnoki Africa nung nütsüng yongsük timtiba aliba linük küm 25 shi yimsü süa aru.

Tir Muhammadu Buhari melener shimtsü atema elections agiba nung vote agütsütsü temsüa alir nisung

million 90 jungnüa lir aser aikati lenir tasen ajanga tensa azüoktsü aser rongsenketzung jenjang tajungba kumdaktsütsü imlar.

Deobarnü agiba election ya timba yimjung nung agi saka polling station kar raksatsüba lir. Lagos aser danga yimtittem nung polling station kanga menur lapokba osang lir. Polling station nung azüingba reprangtsü nisung aika memejangi atatepa liasü.

Linük tesem kar nungbo Deobarnüa vote maneni zünga liasü.

Independent National Electoral Commission (INEC) ajanga state shia indang osang mezüngbuba Deobarnü agütsüdang APC nungi Tinubu-i southwestern Ekiti state tilaka akok, kong People's Democratic Party (PDP) tanabuba jenjang nung liasü, ta ashi.

Tir election indang vote ya anogo ishikabo azüingtsü. Vote ya local polling station nung teka

agi azünger aser results ya INEC indang central database IReV nung upload sütsür.

Ajisüaka INEC indang website nung result tem kanga meilongi inoktsüba ajanga ballot rakzükba aser vote alizükba otsü aliba linük nung tim masüba mapa inyaktsü shisabolur.

Hombarnep tashinung centre 52,000 shi indang result tem agütsür liasü. Nigeria nung

polling centre 176,000 shi lir.

APC governor temi INEC nem Lagos southeast aser ano tesem kar nung khuret agütsür, ta PDP ajanga Hombarnü tai tongloktsü, kong vote agütsütsü temsüa alir nisung million tenet dak tema lir.

Nigeria linük north tsütsü Muslim nunger timba, south tsütsü Khristanpur timba aser region balala nung ethnic group

asem lir.

Lagos aser northwestern Kano aser Kaduna amala tongtipang state temi timba election nung takok angutsü jenjang sayur.

Tir menden koktettsü asoshi candidate kati vote timba ngutettsüla aser Nigeria indang state 36 nung vote agüja aliba shilem asem kumer ana bo angutsüla.



Italian Red Cross volunteers aser coast guards temi southern Italy nung Cutro anasa tzükum nung migrant rong ka raksar alidak nungi nisung tasümgang ka agitetba noksa nung angur. Migrant tem mena aliba rong ya tzüyim nung mükepökba sülen nisung 62 asü aser aika yirua liasü.

## World Boxing Championship: Lovlina, Nikhat na lenisüba nung India team asayatsü



**New Delhi, Tsüklai/February 27 (Agencies):** Tokyo 2020 Olympics bronze medallist Lovlina Borgohain aser world championship tesüsabuba koker alila Nikhat Zareen na leniüba nung India team IBA Women's World Boxing Championships nung asayatsü.

Iba asayamung ya linük yitmtiba kübok Indira Gandhi Sports Complex nung March 15 nungi 26 tashi asayatsü.

Borgohain-i (75kg) tang tashi nung world championships bronze medal ana ngur lir aser tang iba asayamung nung tanga linük nungi Olympics nung medal ngur aliba asayatem den asayaba mapang takok tajungba angutsü atema merangtsü.

Kasa mapang nung Zareen-i 50kg category nung la indang title defend asütsü merangtsü. Lai 2022 kum Istanbul nung asayaba mapang world championship koka liasü.

Sanamacha Chanu na India tenung nungi 54kg aser 70kg category nung asayatsü.

Preeti-i 2022 kum Asian Championships nung bronze medal nguogo aser Sanamacha ya 2021 Youth world champion lir, shiba tawa la asayaba category nung national champion kumogo.

Asian aser national championship tesüsabuba koker alila Saweety Boora 81kg category nung tokteptsü.

Lai 2014 kum World Championships nunga silver medal ngua lir.

Youth world champions Sakshi Chaudhary (52kg) aser Shashi Chopra (63kg) na den 2019 South Asian Games gold medallist Manju Bamboria (66kg) nung aser ajaki iba asayamung nung parnok asayaba yimya tajung sayutsü atema yongya alitsü.

Iba asayamung nung senpet ajak senteper sen crore 20 agütsütsü, kong crore 10 bo gold medal angurtem nem agütsütsü.

India squad: Nitu Ghanghas (48kg), Nikhat Zareen (50kg), Sakshi Chaudhary (52kg), Preeti (54kg), Manisha Moun (57kg), Jaismine Lamboria (60kg), Shashi Chopra (63kg), Manju Bamboria (66kg), Sanamacha Chanu (70kg), Lovlina Borgohain (75kg), Saweety Boora (81kg) and Nupur Sheoran (81+kg).

2022 Commonwealth Games gold medallist Nitu Ghanghas-a 48kg category nung tokteptsü. Youth World championship anaben tashi koker aliba asayar yagi ano asayamung tongtibang ka akoktsü asoshi meranga asayatsü imlar.

Manisha Moun, shibai Delhi nung 2018 kum World Championships asayaba mapang kanga junga shilem agiogo, la linük tenung nungi 57kg featherweight category nung asayatsü.

Manisha-i 2022 World Championships nung bronze medal ngua liasü.

2022 Birmingham Commonwealth Games bronze medallist Jaismine Lamboria-ia 2022 kum iba asayamung 60kg category nung quarter final tonga asayaogo.

Asayatem rongnung tanutsütila ana Preeti aser

## Raducanu temang manemba ajanga Austin Open nung masayatetsü



**Tsüklai/February 27, 2023 (Agencies):** Emma Raducanu tonsil nung timtem aliba ajanga Austin Open nung masayatetsüsa kumogo.

January ita Australia Open tanabuba round nung Coco Gauff makokba sülen arishi kum 20 tain asayar ya tang mezüngbuba asaya nung shilem agitsü liasü, ajisüaka asayamung metenzük tsüngda masayatetsüsa kumogo.

"ATX Open nung masayatetsüsa akümba atema tai tokang," ta Raducanu-i ashi.

Taoba Olympic champion Monica Puig-i ashiba agi,

commercial deals tem angutsü Raducanu langa lir, ajisüaka la tennis asaya nung rangloker asayatsü nungdaker.

"Ni tonsillitis agi timtemdar aser iba hopta asayamung nung metokteptetsüsa kumogo. Austin nung anisüngzüka anendaktsüba atema Asayamung ayongertem dang kanga pelar," ta lai ashi.

2021 US Open champion ya mezüngbuba WTA Tour nung asayatsü mulungteter liasü, koba Westwood Country Club nung Hombarnü tenzüksü.

WTA indang 50th anniversary season nung iba

asayamung ya United States nung asayaba mezüngbuba asayamung asütsü, kong tarep asaya nunga team 16-i shilem agitsü.

ATX Open nung mezüngbuba anogo trok nung session anana asayatsü, koba February 27 nungi March 5 nü tashi asayatsü.

Flushing Meadows nung otsüsütsüsa takok anguba sülen Raducanu yiruba aser form majungba ajanga junga masayateti arudar.

Off season mapang fitness aser conditioning dak rangloker inyaksangshiba sülen la taküm anema lia junga asayatetsü imla atadar.

Taküm kum atema mezüngbuba Grand Slam masaya tsüngda la yiruba ajanga tetsükdaktsü adok, ajisüaka mapang shidak nung taneptsü ngua asayaogo.

Raducanu tang coach pongububa Sebastien Sachs den inyaksangshidar, shibai Belinda Bencic (Olympic gold medallist) len ainogo aser taoba World No 1 asayar Victoria Azarenka aser Germany tsür Julia Gorges nung dena inyakogo.

## ICC's 'Most Valuable Team' nung Richa densema lir

**New Delhi, Tsüklai/February 27 (Agencies):** ICC Women's Under-19 T20 World Cup nung kanga junga asayaba ajanga alima ajungai jangja akümba sülen Richa Ghosh-i maneni Deobarnü tembangba senior Women's T20 World Cup nung kanga junga asayaogo.

Women's T20 World Cup nung India team semifinal tonga asayaba nung Richa-i kanga junga batting amenba sülen, la ICC's Most Valuable Team of the tournament nung züngoksemogo. Arishi kum 19 tain wicket-keeper ya iba team nung India tsürtem rongnung la kija lir.

Richa-i iba asayamung nung run 136 yanglu aser la indang strike rate 130.76 liasü. Lai Pakistan den asayaba mapang out mesüi run 31, West Indies den asayaba mapang out mesüi run 44 aser England den asayaba mapang out mesüi run 47 yanglua liasü.

Iba asayamung nung lai catch pong aser stumping ana süja liasü. Australia team nungi iba team nung asayar pezü densema lir, shirnoki otsü tasen yanglua iba asayamung tokbenbuba kokogo.

Australia tsürtem rongnungi

wicketkeeper-opener Alyssa Healy (run-189; average 47.25, wicket 4), all-rounder Ashleigh Gardner (run 110, average 36.33, wicket 10), Darcie Brown (wicket 7) aser Megan Schutt (wickets 10) nung densema lir.

Iba team ya panel kati shimogo, kong commentator aser taoba mapang West Indies nung asayar Ian Bishop aser taoba mapang Australia tetsür team nungi asayar Melanie Jones nata densema liasü.

Most Valuable Team of the Women's T20 World Cup (in batting order):

Tazmin Brits (South Africa) run 186; Alyssa Healy (wk) (Australia) run 189 aser dismissal 4; Laura Wolvaardt (South Africa) run 230; Nat Sciver-Brunt (c) (England) run 216; Ashleigh Gardner (Australia) run 110 wicket 10; Richa Ghosh (India) run 136; Sophie Ecclestone (England) wicket 11; Karishma Ramharack (West Indies) wicket 5; Shabnim Ismail (South Africa) wicket 8; Darcie Brown (Australia) wicket 7; Megan Schutt (Australia) wicket 10; 12th player: Orla Prendergast (Ireland) run 109 aser wicket 3.

## Bournemouth madak takok ngua City-i maneni Arsenal nongshir

**Tsüklai/February 27, 2023 (Agencies):** Honibarnü Manchester City aser Bournemouth na asaya goal 4-1 agi akokba sülen Premier League nung temaba jenjang nung aliba Arsenal team dang nungi City pur point ana agi dang tajemba lir.

Asaya nung City pur atema Julian Alvarez, Erling Haaland, Phil Foden nungeri goal kaka idaktsü aser Chris Mepham-i own goal ka idakja liasü. Tang City pur point 55 aser Arsenal pur point 57 lir ajisüaka Arsenal pur asaya ka tajemba asayar lir.

Honibarnüsa Arsenal puri goal 1-0 agi Leicester City koka parnok mapang tatsüka atema point pongu agi timba aküm aser iba ajanga Arsenal nem pressure agüja liasü.

City puri asaya kanga junga tenzüik aser minute 15buba nung Haaland-i metsüba ball ka crossbar nung ondaker adokba Alvares-i idakja liasü.

Iba sülen asaya mezüngbuba shilem tembangtsü lia Haaland-i pa asoshi league goal 27buba idakja Sergio Aguero-i 2014-15 season nung idaktsür aliba goal ajateta City atema Premier League season ka nung goal timtiba idaktsüba asayar

kumogo. Francis Lee-i 1971-72 kum goal 33 idaktsüba sülen City nungi asayatem rongnungi Norway nung asayar yagi top-flight season ka nung goal timba idaktsüogo.

League asaya 13 asayatsü anunga lia Tommy Johnson-i season (1928-29) ka nung goal 38 idakja City asayatem rongnungi goal timtiba idaktsür aliba ya Haaland-i ajatetsü ana nung lir.

Asaya tanabuba shilem nung Philip Billing-i ball mishidak pass asüba sülen Foden-i City atema tasembuba goal idaktsü aser iba sülen tia maka Mepham-i own goal ka idakja goal 4-0 aküm.

Asaya nung Bournemouth atema minute 83buba nung Jefferson Lerma-i goal ka idakja liasü. Bournemouth pur Honibarnü relegation zone-i iogo.

Bournemouth aser City na 12ben asayaogo aser parnoki City pur ken danga koka mali. City pur EPL nung Nottingham aser Champions League nung RB Leipzig den draw asüba sülen iba asaya akokba ajanga parnok asaya yimya dak tali t e m u l u n g l e m t e t a kumdaktsütsü.

## BILEMDANGANG

"O Tanep agi nisung ka mulung züngzükdaktsür."